



## **TFLW cetus kreativiti pelajar menerusi pementasan sketsa mini**

November 21, 2022 @ 5:53pm

Serdang: Fakulti Bahasa Moden dan Komunikasi (FBMK) Universiti Putra Malaysia (UPM) dengan kerjasama Sekolah Menengah Kebangsaan (SMK) Sri Sentosa Kuala Lumpur menganjurkan 'Theatre for Life Workshop' (TFLW) pada 12 November lalu di Dewan Zaaba, FBMK, UPM.

Sebanyak empat sketsa mini bertemakan isu sosial seperti ketagihan sosial media, penyalahgunaan bahan terlarang, delikueni dan hubungan cinta di sekolah dipentaskan.

Objektif utama program yang membabitkan 25 pelajar sekolah, tiga guru pengiring, tujuh pegawai akademik dan tiga alumni FBMK itu ialah memberi ruang kreatif kepada pelajar melalui pementasan sketsa mini.

Pengasas program, Prof Madya Dr Arbaayah Ali Termizi berkata, pelajar didedahkan dengan proses pra-pementasan seperti membangunkan papan cerita, menulis skrip cerita, mengendalikan prop dan mementaskan hasil karya masing-masing.

"TFLW ialah projek komuniti di bawah naungan Jabatan Bahasa Inggeris, FBMK sejak 2016 lagi. Namun Projek TFLW bersama SMK Sri Sentosa adalah pertama pasca pandemik Covid-19," katanya.

Sementara itu, Ketua program Jabatan Bahasa Inggeris FBMK, Prof.Madya Dr Hardev Kaur berkata, TFLW juga memperkasakan kemahiran berkomunikasi dan ekspresi diri, selain memantapkan penggunaan Bahasa Inggeris.

"Kami berharap program ini dapat meningkatkan kerjasama antara universiti dan sekolah serta memberi impak penambahan pengetahuan pelajar terhadap isu semasa yang digarap dan disampaikan secara kreatif melalui pementasan sketsa mini dalam Bahasa Inggeris," katanya.

Dekan Fakulti Bahasa Moden dan Komunikasi, Prof. Madya Dr Hazlina Abdul Halim turut hadir menyaksikan pementasan mini teater dan menyampaikan cenderahati dan sijil kepada peserta.